

## DOMENIE XXXII «VIE PAL AN»

### Antifone di jentrade cf. Sal 87,3

Ch'e rivi, Signôr, denant de tô muse la mê preiere;  
slungje al gno lament la tô orele.

### Colete

Diu onipotent e bon di cûr,  
slontane di nô dut ce che nus fâs mâl  
par che, pronts cul cuarp e cu l'anime,  
o podìn servîti in plene libertât.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE 1 Re 17,10-16

La vedue e fasè cu la farine une pete e je quartà a Elie.

Dal prin libri dai Rês

In chei dîs, Elie si cjapà sù e al le a Zarepte. Biel ch'al rivave te jentrade de citât, e jere aventi une vedue ch'e stave cjapant sù stecs; le interpelà e i disè: «Puartimi un sclip di aghe intun crep, ch'o ai di bevi». Cuan che e stave lant a cjolile, i vosà: «Puartimi ancje un bocon di pan inte tô man». Jê i rispuindè: «Pe vite dal Signôr, to Diu! No ai pan cuet; o ai si e no un pugn di farine tune pile e un got di vueli tun crep; o stoi cjapant sù doi stecs par dâ dongje alc par me e par gno fi: o magjarin e o muraïn». Ma Elie i disè: «No sta vê pôre; va e fâs ce che tu âs dit. Prime però preparimi une pete e quartime. Po tu 'nt fasarâs par te e par to fi: parcè che il Signôr, Diu di Israel, al dîs cussì: La pile di farine no si sbassarà e il crep dal vueli no si disvuedarà fintremai a la di che il Signôr al mandarà la ploe su la face de tiere». Jê e le e e fasè come che i veve dit Elie e a mangjarin jê, lui e so fi. La pile de farine no si sbassà e il crep dal vueli no si disvuedà seont la peraule che il Signôr al veve dite a mieç di Elie.

Peraule di Diu.

### SALM RESPONSORIÂL dal Salm 145

R. Furtunâts i puars tal spirt: il ream dai cîi al è lôr.

O ben:

R. Aleluia, aleluia, aleluia.

Il Signôr al manten la sô fedeltât par simpri.

Ur fâs justizie ai tibiâts,

ur da il pan a di chei ch'a son afamâts.

Il Signôr i presonîrs al libere. R.

I vôi dai varps il Signôr al torne a vierzi,

il Signôr al torne a tirâ sù chei ch'a son par tiere,

il Signôr i vûl ben a la int juste,

il Signôr al vuarde la int foreste. R.

Al viôt dal vuarfin e de vedue,

impen che lis trainis dai triscj lis savolte.

Il Signôr al regnarà par simpri:

il to Diu, Sion, di ete in ete. R.

### SECONDE LETURE Eb 9,24-28

Crist si è ufiert une volte par dutis cul fin di parâ jù il pecjât di cetancj di lôr.

De letare ai Ebreos

Crist nol è jentrât tun santuari fat de man dal om, spieli di chel vêr, ma adiriture tal cîl, par presentâsi denant di Diu pal nestri ben, e no par ufrîsi se plui voltis, usance il prin predi ch'al jentre tal santuari ogni an cul sanc di chei altris. In chest câs, di fat, al varès scugnût patî plui voltis de creazion dal mont in ca. Cumò invezit al è comparît une volte sole, cuant che i timps a jerin al colm, par parâ jù il pecjât midiant dal so sacrifici. E come ch'al è distinât pai oms ch'a muerin une volte sole, e dopo al ven il judizi, cussì Crist, dopo di jessisi ufiert une volte par dutis cul fin di parâ jù il pecjât di cetancj di lôr, al tornarà a pandisi une seconde volte, cence nissun rimpin cul pecjât, a di chei che lu spietin, par salvâju.

Peraule di Diu.

### **CJANT AL VANZELI Mt 25,34**

**R.** Aleluia, aleluia.

Vignît ca, benedets di gno Pari, al dîs il Signôr,  
a cjapâ paronance dal ream prontât par vualtris  
di cuant ch'al è stât fat il mont.

**R.** Aleluia.

### **VANZELI Mc 12,38-44**

**Cheste biade vedue, te sô miserie, e à dât dut ce ch'e veve.**

Dal vanzeli seont Marc

In chê volte, Gjesù biel insegnant al diseve a la int: «Vuardaitsi dai scrituriscj, che i tegnin une vore a lâ ator vistûts di fin e a jessi saludâts tes placis, a cjapâ lis primis sentis tes sinagoghis e a sentâsi tai prins puescj intai gustâs; a glotin lis cjasis des veduis e a fasin fente di preâ a lunc. A varan une condane plui tremende».

Sentât denant dal tesaur, Gjesù al stave cjalant cemût che la int e butave i bêçs dentri dal tesaur.

And jere tante int siore, ch'a butavin dentri une vore. Rivade però une puare vedue, e butà dentri dome dôs palancutis, ch'a an il valôr di un cuadrant. Alore lui al clamà dongje di se i siei dissepui e ur disè: «Us al dîs in veretât che cheste biade vedue e à butât dentri plui di ducj chei ch'a an butâts bêçs intal tesaur. Di fat ducj a an dât di ce che ur vanzave, ma jê, te sô miserie, e à butât dentri dut ce ch'e veve, dute la sô bocjade».

Peraule dal Signôr.

### **Su lis ufiertis**

Cjale di bon voli, Signôr, lis ufiertis che ti presentin  
par che, cuntune sante dispozizion,  
o podìn vê ce ch'o celebrin tal misteri de passion di to Fi.  
Par Crist nestri Signôr.

### **Antifone a la comunion Sal 22,1-2**

Il Signôr al è il gno pastôr: no mi mancjarà nuie.

Mi fâs polsâ là che i passons a sverdein,  
mi mene là ch'a son aghis frescjis.

### **O ben: cf. Lc 24,35**

I dissepui a ricognoşserin Gjesù, il Signôr, tal crevâ il pan.

### **Daspò de comunion**

Ti ringraciìn, Signôr,  
di vênus sostentâts cul to sant regâl  
e o prein il to boncûr

che il to Spirt al conservi in gracie e scletece  
chei ch'a àn ricevude la fuarce dal cîl.  
Par Crist nestri Signôr.